

四庫全書

史部

欽定四庫全書

史部

欽定續文獻通考卷三百三十七

主事臣陳若霖覆校

總校官內閣中書臣孫溶

欽定四庫全書

欽定續文獻通考卷二百三十七

四裔考

臣等謹案馬端臨作四裔考各述其國俗與夫中
土交通者所以誌區寓之攸分也粵稽禹貢五服
周官九畿皆由侯甸以迄要荒自古疆域率視政
教所及為限而聲靈之所震疊德化之所覃被則
荒徼絕域琛賁畢至圖經載記由來尚矣若乃淮

徐吳楚在成周胥為蠻夷孟子謂舜為東夷之人文
王為西夷之人上天篤生神聖固不擇地無足為
諱者彼鴻溝判東西長江限南北島夷索虜交相
詆譏坐井面牆方隅自域蓋出自史氏拘墟之見
烏覩所謂大無外之規乎我

朝肇興東土本金源女直境實居其地而非其部人
迨

列祖奄一區宇薄海內外悉主悉臣幅員之廣亘古未有

前代所列為四裔者今則盡隸版圖制同郡縣自
不得更以徼外目之第歷代史冊惟就一朝形勢
以為畦畛據事直書用志沿革爰採掇舊文覈之
大清一統志以徵往代紀載之實且昭

聖朝會同之盛焉

東夷

高麗

耽羅附

遼聖宗統和三年七月詔諸道各完戎器以備東征高

麗

八月以遼澤沮洳罷師十年以東京留守蕭恒德等
伐高麗十一年高麗王治遣朴良柔奉表請罪詔取
女直鴨綠江東數百里地賜之十三年十一月遣使
冊治為王十四年三月王治表乞為婚即以駙馬蕭
恒德女嫁之十五年十一月治薨詔其姪誦權知國
事十六年十一月冊誦為王二十八年五月誦為西京
留守康肇所弑擅立誦從兄詢八月帝自將伐高

麗詢奉表乞罷師不許十一月大軍渡鴨綠江肇拒戰于銅州敗之肇復出右皮室祥袞耶律達魯擒肇等銅霍貴寧等州皆降詢上表請朝許之以政事舍人馬保佑為開京留守安州團練使王八為副留守太子太師伊林將騎兵一千送保佑等赴開京守將卓思正殺我使者十人領兵出拒保佑等復還遣巴雅爾博諾攻開京遇敵于京西敗之詢棄城遁去遂焚開京至清江而還開泰元年四月詢遣蔡忠順來

乞稱臣如舊詔詢親朝八月詢奉表稱病不能朝詔復取六州地三年五月詔國舅祥袞蕭迪里東京留守耶律托實等討高麗造浮梁于鴨綠江城保宣義定遠等州四年以樞密使耶律世良殿前都檢點蕭虛烈總兵伐高麗五年正月戰于郭州西破之六年九月樞密使蕭合卓等攻高麗興化軍不克師還七年十月復伐高麗我軍不利八月遣郎君哈布爾等率諸部兵會大軍討高麗九年詢以降表進釋其罪

太平二年詢薨遣使來報嗣位即遣使冊王欽為王

臣等謹按高麗即朝鮮馬端臨考載高麗事終于

宋寧宗慶元五年七月詔禁商人持銅錢入其國

蓋絕之也若高麗與遼相為終始二百餘年自太

祖九年至太宗天顯二年遣使進貢已見土貢考

又考歷代甲子圖聖宗統和三年即宋太宗雍熙

二年至太平二年則真宗天禧二年也端臨考與

遼史所載類可參觀若此後多不相符者

興宗重熙十五年八月冊高麗王欽子徽為王

時以欽薨遣使來告故也二十三年六月徽請官其
子詔加檢校太尉至道宗太康四年徽請賜鴨渌江
以東地不許九年八月徽薨九月以徽子三韓國公
勲權知國事十二月勲薨大安元年十一月冊勲子
運為國王十年夏運薨子昱遣使來告壽隆元年十
一月昱病命其子顥權知國事三年三月昱薨五年
十月顥乞封冊六年封顥為三韓國公天祚帝乾統

五年十一月顯薨子侯遣使來告八年四月封侯為三韓國公贈其父顯為國王天慶十年遼乞兵于高麗以禦金人責之未幾而遼亡

顧炎武日知錄曰遼史外紀有高麗王子三韓國公勲三韓國公顯三韓國公侯其地理志有高州

三韓縣辰韓為扶餘并韓為新羅

北史以辰韓為新羅

馬韓

為高麗開泰中聖宗伐高麗俘三國之遺人置縣據此乃得三國之人置縣于內地而取三韓之名

耳

正如漢時上郡有龜茲縣
不可便以為西域之國

今人乃謂遼東為三

韓是以內地而目之為外國非也

臣

等謹按歷代甲子圖興宗重熙十五年即宋仁

宗慶厯二年道宗壽隆元年即宋哲宗元祐三年

天祚帝天慶十年則宋徽宗政和四年也以宋史

及瑞臨考叅之徽之卒在元豐六年即大安六年

而遼史謂為太康九年運為勲之弟而遼史謂為

子運立四年卒而遼史謂為十年彼此不符類多

如是

金穆宗

世祖弟

時高麗始通使

時戚屬有疾高麗有善醫者居女直之完顏部使診視之即愈乃送之歸因謂高麗人金部屬日強兵益精悍年穀豐稔高麗王聞之乃通使康宗

亦世祖弟

時高

麗殺金使者阿果星根二人太祖將兵大破之進圍其城高麗復請和許歸亡入之民罷九城之戍復所侵故地遂與之和太祖收國元年九月克遼黃龍府

遂攻保州保州近高麗遼侵高麗置保州至是盡降
二年閏正月高麗遣使來賀捷且曰保州本吾故地
願以見還帝諭以俟有表請當別議太宗天會四年
六月國王王楷遣使奉表稱藩優詔答之凡通使往
來一依事遼舊制熙宗皇統六年正月楷薨子昞嗣
立世宗大定十一年四月昞弟翼陽公皓廢昞自立
詐稱讓國遣使以表來上大約稱先臣楷遺訓傳位
于弟又言其子有罪不可立之意乃却其使者而以

詔書遣使詳問王暉使至高麗竟不得見暉乃以詔
授皓轉取暉表附奏其表與前表大概相同皓尋遣
使請封十二年遂賜封冊章宗承安三年皓表自陳
衰病以國讓其弟暉是歲皓薨暉嗣立泰和四年暉
薨子諤嗣立衛紹王至寧元年諤薨明年宣宗遷汴
遼東道里不通矣

元太祖十三年高麗國人洪大宣詣軍中降

先是契丹人瑠格等竄據高麗江東城至是遣兵征

之洪大宣來降共討滅瑠格

太宗三年八月命將征高麗設官分鎮所取之地而還時以高麗殺使者命將薩喇達征其國取四十餘城國人洪福源迎降于軍乃使招其主王瞰瞰遣其弟懷安公使請降薩喇達承制設官分鎮之遂班師明年六月高麗盡殺所置嚕嚕齊七十二人以叛遂率王京及諸州縣民竄居江華島八月復遣兵討之十月瞰遣使上表陳情五年四月詔諭瞰悔過來朝終

不至至十三年秋瞰以族子縉為己子入質憲宗未
遣其世子佖入朝

世祖中統元年三月命高麗世子佖歸國為王

陝西宣撫使廣希憲言高麗遣佖入覲會憲宗將兵
伐宋佖留三年不遣今其父已死若立佖遣歸國彼
必懷德于我是不煩兵而得一國也帝是其言故有
是命二年六月佖更名植遣子懋奉表以聞八月遣
使護懋歸國至元三年二月帝欲通好日本以高麗

與日本隣可為鄉導乃遣使先至高麗諭之五年帝
以太祖法制凡內屬之國納質助軍輸糧設驛編戶
籍置長官已嘗明諭高麗而稽延至今太宗時王緯
等已入質驛傳已粗立餘率未奉行今將問罪于宋
其所助士卒舟艦幾何輸糧則就為儲積至若設官
及戶版事其意謂何特遣使持詔問之六年七月遣
使相視耽羅等處道路詔植選官引達以人言耽羅
海道往南宋
日本甚
易故也八月世子慤入朝奏國人林衍擅廢植立其

弟安慶公曄事議者言今之高麗乃古新羅百濟高
句麗三國併而為一大凡藩鎮權分則易制乃于次
年正月詔西京內屬改東寧府畫慈悲嶺為界置安
撫使率兵戍之二月遣軍送植就國十一年五月皇
女和塔拉都哩默色下嫁于慙七月植薨子慙襲十
三年七月慙遣使奉表賀平宋十一月奏改名晷十
八年六月晷言本國置驛四年民畜凋敝勅併為二
十站二十年五月立征東行中書省以高麗國王與

安塔哈共事三十年二月賸復改名𠂔成宗大德元年十一月從𠂔請以世子諒為王二年七月中書省奏諒當廢復以其父𠂔為王𠂔復位八年而薨子諒復襲王位諒尚布達實哩公主十一年進爵瀋陽王繼襲位高麗國王生子燾燾受遜位以仁宗皇慶二年四月封高麗國王是年其弟𦉳立為世子以其父瀋陽王諒請于朝故也諒又嘗更名章

元史外夷傳曰高麗之與國耽羅元世祖既臣服

高麗以耽羅為南宋日本衝要亦甚注意至元十年命將平之即其地立耽羅國招討司屯鎮邊軍千七百人三十一年高麗王上言耽羅之地自祖宗以來臣屬其國林衍逆黨金通精既平之後尹邦實充招討副使以計求徑隸朝廷乞仍舊帝曰此小事可使還屬高麗遂復隸焉

明太祖即位之元年遣使齎璽書賜高麗國王二年封高麗國王額為王秋帝以額惟知崇信佛氏

以書諭之大畧謂王公設險未嘗去兵民以食為天國必有出政之所因賜六經四書通鑑三年正月命使往祀其國之山川五年表請遣子弟入學帝以入學固美事但涉海遠不欲者勿強七年額為權相李仁人所弑先是額無子以寵臣辛朮之子禍為子于是仁人立禍十年至十七年每請額謚號襲王爵未允十八年命封禍為高麗國王賜額謚恭愍二十年十二月命戶部咨高麗王鐵嶺北東西之地舊屬開

元者遼東統之鐵嶺之南舊屬高麗者本國統之各
正疆界毋侵越二十一年十月禍請遜位于其子昌
二十二年李成桂廢昌而立定昌國院君瑤二十五
年九月高麗知密直司事趙胖等奏言本國自恭愍
王薨無嗣權臣李仁人以辛旽子禍主國事昏亂好
殺至欲興師犯邊大將李成桂以為不可而回軍禍
負罪惶懼遜位于子昌國人弗順啓請恭愍之妃安
氏擇宗親瑤權國事已及四年昏戾信讒戕害勲舊

子夷痴騷不慧國人謂瑤不足主社稷今以安氏命
退瑤于私第王氏子姓無可當與望者中外人心咸
繫成桂臣等與國人耆老共推主國事惟聖主俞允
帝以高麗僻處東隅非中國所治令禮部移諭果能
順天道合人心不啟邊釁使命往來實爾國之福冬
成桂請更國號命仍古號曰朝鮮二十六年六月請
更己名曰旦從之至惠帝建文初旦表陳年老以子
芳遠襲位許之

臣等謹按明史外國傳永樂間降祭海嶽祝文稱
李成桂為仁人子又祖訓亦載仁人子成桂更名
曰旦後成桂子芳遠奏辨太宗許令改正正德時
修會典嘉靖八年重修會典其君臣皆奏辨先世
無篡逆事萬厯初屢乞會典為其先康獻王雪冤
十六年正月會典成請給前書以終前命許之蓋
成桂之自立與仁人本異族也

成祖永樂元年朝鮮請冕服書籍許之

帝嘉其能慕中國禮賜金印圭冕及經籍綵幣十二月又從芳遠請立其子禔為世子六年秋遣使來告其父旦之喪命官弔祭賜諡康獻十六年奏世子禔不肖第三子禔孝弟力學國人所屬請立為嗣併陳已年老請以禔理國事命封禔為國王時帝已遷北都朝鮮益近而事大之禮益恭朝廷亦待以加禮二十年芳遠卒賜諡恭定二十一年七月禔請立嫡子珣為世子從之

宣宗宣德八年朝鮮請遣子弟入學不許

其王禔奏遣子弟詣太學或遼東學帝不允賜五經

四書性理通鑑綱目諸書至英宗正統元年三月放

朝鮮婦女金黑等五十三人還其國

金黑等自宣德初至京師至是

遣中官送回

景帝景泰元年禔卒賜弔祭謚莊憲封子珣

為國王冬賜珣誥命封其子弘暉為世子三年秋珣

卒賜謚恭順子嗣立三年以年幼且嬰夙疾請以叔

瑑權國事七月上表遜位乃封瑑為國王瑑請立子

暉為世子從之成化四年稔卒賜諡惠莊封世子暉
為王六年暉病篤以所生子幼命其兄故世子暉之
子娶權國事暉卒賜諡襄悼命娶嗣位十年追贈暉
為國王諡懷簡十九年四月封娶長子懽為世子孝
宗弘治七年十二月娶卒賜諡康靖明年四月封懽
為國王十五年冬封懽長子顥為世子武宗正德二
年懽以子顥天請以國事付其弟懽遂嗣位十五年
冬封懽子皓為世子世宗嘉靖二十三年冬懽卒諡

恭禧二十四年其子皓立未踰年卒謚榮靖九月皓弟權國事峴遣使謝祭謚并請襲封詔許之三十一
年冬以洪永間所賜樂器敝壞奏求律管更乞遣樂
官赴京校習許之穆宗隆慶元年冬峴卒謚恭憲命
其姪肱襲封

神宗萬厯二十年七月以朝鮮被倭難命出師東征
先是倭酋平秀吉者薩摩州人初隨倭闖白信長會
信長為其下所弑秀吉遂統信長兵自號闖白刼降

六十餘州朝鮮與日本對馬島相望時有倭夷往來互市十九年十一月朝鮮奏平秀吉聲言明年三月入犯詔兵部申飭海防至是年五月秀吉遂分渠帥行長清正等率舟師逼釜山鎮潛渡臨津時朝鮮承平久兵不習戰肱又酒酒弛備猝島夷作難望風皆潰肱棄王城令次子瑄攝國事奔平壤已復走義州顧內屬部議令駐劄險要以待天兵圖恢復而是時倭已入王京毀墳墓劫王子陪臣剽府庫八道幾盡

沒旦暮且渡鴨綠江請援之使絡繹于道廷議以朝鮮為國藩籬在所必爭由是出師東征并有封貢之議自倭亂朝鮮七載喪師數十萬糜餉數百萬中朝與屬國迄無勝算至二十六年七月平秀吉死而禍始息二十七年四月以平倭詔告天下

王圻曰高麗之釜山去日本之對馬島僅一日程相傳舊屬日本為大海限隔棄于朝鮮先是日本以歲歛借朝鮮穀萬斛迨後遣使往索日本乃以

釜山地為言朝鮮所遣使謂之曰我鴨綠江北有

朝鮮地因三道江阻絕久為大唐所有

大唐指中國也汝

能助我復此地則釜山亦可歸也日本人以為然

平秀吉果領兵赴朝鮮未至京而眩遁走一國為

墟特命重臣提兵往救踰年相持不退兵部尚書

石星輕聽沈惟敬言

惟敬嘉興人市中無賴也

加遊擊銜往諭

日本罷兵惟敬陰許議和且許復寧波貢道事泄

逮惟敬下獄與星皆擬重典更調兵增餉費至百

萬彼此互有勝負倭衆盤據釜山蓋屋治田為久
留計至平秀吉病死倭始撤歸而其時疲中國以
捍外藩七八年矣

三十六年十月封朝鮮世子琿為王

先是高麗王肱庶長子臨海君瑋陷賊中驚憂成疾
次子光海君琿收集流散頗著功績請立為嗣時國
儲未建中外惘疑禮部尚書范謙于朝鮮易封事三
疏力持卒不許至是琿卒從其國臣民請許之次年

二月謚肱曰昭敬至熹宗天啓三年四月朝鮮國人廢琿而立其姪綾陽君倬四年四月封倬為國王

愍帝崇禎十年正月朝鮮告急命調各鎮舟師赴援

三月山東巡撫顏繼祖奏屬國失守江華已破世子被擒國王出降宜急勅鎮臣以堅守皮島為第一義帝以不能協圖匡救切責之亡何皮島亦破朝鮮遂降于

大清與明絕矣

王圻曰高麗分八道中曰京畿統三郡楊根豐德水城三

府

漢城開城長湍

七州

楊廣潤果驪谷坡

三縣

交河三登土山

東曰江源

統七郡

杆城通川松岳高平海寧越旌善

五府

襄陽江陵三陟淮陽鐵原

四州

原江 提漢十縣

平康安昌烈山麒麟酒泉丹城蹄麟蔚珍瑞和歙谷

本滅貊地西

曰黃海統三郡

遂安延平安邦

三府

平山瑞興承天

五州

黃海白仁愛

八縣

安岳三和龍岡江西咸從牛峯文化長淵

古朝鮮馬韓舊地南曰

全羅統三郡

靈巖古阜珍島

二府

全州南原

四州

羅濟光昂

二十三

縣

萬頃茂長鎮安扶安全渠康津興德黃成樂安昌平濟南會寧大江臨波古阜南陽富順扶寧

麻仁緒城海
南神云移安

本并韓地東南曰慶尚統七郡

蔚山
咸陽

熊川陝川永
川梁山清道

六府

金海善山寧海
密陽安東昌原

五州

泗慶尚
晉蔚

一

十三縣

清河東萊義城義興間慶巨濟昌
寧三嘉安陰昌原山陰高靈守城

乃辰韓

地西南曰忠清統四郡

清風溫陽
天安林川

九州

忠矜興清
靖禮公幸

洪

七縣

永春扶餘保寧報
恩石城連山燕岐

皆古馬韓域東北曰咸

鏡統三郡

瑞川蜀
莫寧遠

五府

咸興鏡城永
興惠州安邊

九州

延德開
利城蘇

合會寧
燕隋

本高句麗地西北曰平安統九郡

嘉山郡
山价川

熙川云興宣州
江界慈山龍川

九府
平壤咸川見仁寧邊定

一十

六州

安甕定青鐵平撫常義宿網渭朔銀買昇

六縣

德川孟山陽德本中和秦川江東

本

朝鮮故地其忠清慶尚全羅三道地廣物衆州縣

雄巨最為富庶俗尚詩書人才之多倍于諸道平安

咸鏡二道境接靺鞨俗尚弓馬兵卒精強東西南瀕

海北隣女直西北抵鴨綠江東西二千里南北四千里

日本

雞籠山附

元世祖至元三年八月遣使往日本

先是元年從高麗人趙鼎等言以日本國可通擇可

奉使者至是命兵部侍郎赫德等充國信使持國書
道由高麗高麗國王植遣使導詔使往不至而還五
年九月命赫德等復持書往至對馬島為日本人所
拒僅執其塔二郎彌二郎二人而還六年六月命送還
執者俾中書省牒其國亦不報十月又命秘書監趙
良弼往至八年九月高麗王植遣通事道送至其國
日本始遣彌四郎者入朝帝宴勞遣之九年二月五
月高麗王兩以書往皆不報十一年三月命以舟師征

日本十月入其國敗之而官軍不整又矢盡惟擄掠四境而歸十二年二月遣禮部侍郎杜世忠等往使復致書亦不報十四年日本遣商人持金來易銅鐵許之十七年二月日本殺國使杜世忠等十八年正月命日本行省右丞相阿爾哈右丞范文虎及征東元帥實都洪察球爾等率十萬人征之行省官議事不相下全師盡喪十萬之衆得還者敗卒于闐莫青吳萬五三人耳二十一年以其俗尚佛遣王積翁與補陀僧如智往使舟

中有不願行者共謀殺積翁不果至二十三年帝以日本未嘗內侵今交趾犯邊宜置日本專事交趾成宗大德三年遣僧寧一山者附商舶往使日本而日本人竟不至

明史外國傳曰日本古倭奴國唐咸亨初改日本以近東海日出而名也地環海惟東北限大山有五畿七道三島共一百十五州統五百八十七郡其小國數十皆服屬焉國小者百里大者不過五百里戶小者千多不過一二萬國主世以王為姓

羣臣亦世官宋以前皆通中國朝貢不絕元數遣使招之不至乃命舟師征之至五龍山遭暴風軍盡沒後終元世未嘗通明興方國珍張自誠相繼誅服諸豪亡命往往糾島人入寇山東濱海州縣臣等謹案馬端臨考載日本疆土所至與國王世系及物產風俗甚詳其奉職貢自漢武帝迄宋寧宗嘉泰時未嘗絕王圻本謂遼時亦入貢究未見于史金之世概無聞焉故續考斷自元始

明太祖洪武二年三月遣使詔諭日本國

時遣行人楊載往且詰以入寇之故其王良懷不奉
命復寇山東轉掠溫台明州旁海民遂寇福建沿海
郡三年又遣萊州府同知趙秩責讓之良懷禮遇甚
優遣其僧奉表稱臣且送還被掠人口帝念其俗佞
佛可以西方教誘之乃命僧祖闡等至其國國人頗
敬信而王則傲慢無禮拘之二年而後還京時良懷
年少有持明者與之爭立國內亂又頻入寇掠命移

牒責之自後胡惟庸謀逆欲藉日本為助乃厚結寧
波衛指揮林賢佯奏賢罪謫居日本令交通其君臣
尋奏復賢職遣使召之其王遣僧如瑤率兵四百餘
人詐稱入貢且獻巨燭藏火藥刀劍其中既至而惟
庸已敗計不行越數年其事始露乃族賢而怒日本
決意絕之專以防海為務後著祖訓列不征之國十
五曰日本與焉自是倭使不至而海上之驚亦漸息

王圻曰倭風順四五日可至寧波六七日可至天

津衛七八日可至登萊但登萊等處海中多礁石
不便行舟耳倭之始通中國實自遼東由六朝及
今乃從南道浮海猝自溫州寧波入東北風迅自
彼來此約可四五日程而西南風迅自此之彼亦
約四五日程蓋其去遼甚遠而去閩浙甚邇若盡
其國界則東西長行可四五月南北短行三月而
皆極于海其西北至高麗也必由對馬島開洋順
風僅一二日南至琉球也必由薩摩州開洋順風

七日其貢使之來必由博多開洋厯五島而入中國以造舟水手俱在博多故也貢舶回則徑收長門抽分司官在焉故也

成祖永樂三年十一月日本王源道義遣使獻賊俘于朝

先是對馬臺岐諸島賊掠濱海居民因倭使諭其王捕之王發兵盡殲其衆繫其魁二十人以獻六年十二月其國世子源義特遣使來告父喪賜謚恭獻封

年寇松門金鄉平陽十七年倭船入王家山島都督
劉榮率精兵疾馳入望海埭賊數千人分乘二十舟
直抵馬雄島進圍望海埭榮發伏出戰奇兵斷其歸
路賊奔櫻桃園榮合兵攻之斬獲千二百九十餘榮
封廣寧伯自是倭不敢窺遼東二十年倭寇象山至
英宗正統四年五月倭船四十艘連破台州桃渚寧
波大嵩二千戶所又陷昌國衛大肆殺掠八年五月

寇海寧景帝景泰四年貢使至臨清掠居民貨天順
初其王源義政移書朝鮮王令轉請遣使謝罪廷議
使臣不得仍前肆擾成化四年十一月倭使傷人于
市曲赦之孝宗弘治九年三月王源義高遣使來京
還至濟寧其下仍持刀殺人詔嚴防禁武宗正德五
年春時劉瑾竊柄納其王源義澄所使宋素卿黃金
千兩賜飛魚服前所未有也素卿鄆縣朱氏子名縞
幼習歌唱倭使見悅之而縞叔澄負其直因以縞償

至是充正使至蘇州澄與相見後事覺法當死瑾庇之謂已自首並獲免

臣等謹按王圻謂永樂初西洋之役雖威震海表而華人習知遠夷饒金寶夷人亦知我海道奸闖出入彼此相糾故海中寇盜復起若非廣寧之捷厥禍未已然以明史考之則倭之構禍實與明代相終始矣

世宗嘉靖二年五月議絕倭使

時其使宗設先抵寧波未幾素卿偕瑞佐復至互爭
真偽素卿賄市舶太監賴恩宴時坐素卿于宗設上
船後至又先為驗發宗設怒與之鬪殺瑞佐焚其舟
追素卿至紹興城下素卿竄匿他所免凶黨還寧波
所過焚掠奪船出海都指揮劉錦戰沒巡按御史歐
珠據素卿狀言西海路多羅氏義興者向屬日本統
轄無入貢例因貢道必經西海正德朝勘合為所奪
我不得已以弘治朝勘合由南海路起程比至寧波

因詰其偽致啓釁部議素卿言未可信宜移咨其王
究治報可御史熊蘭等交章言素卿罪重不可貸請
并治賴恩及海道副使張芹等閉關絕貢事方議行
會宗設黨中林望古多羅逸出之舟為暴風飄至朝
鮮朝鮮人擊斬三十級生禽二賊以獻給事中夏言
因請逮赴浙江會所司與素卿雜治至四年獄成素
卿及中林望古多羅並論死十八年七月具王源義
晴貢使至寧波守臣以聞時不通貢者已十七年敕

巡按御史督同三司官覈果誠心效順如制遣送否
則却回且嚴居民交通之禁至二十三年七月部議
却之其人利互市留海濱不去巡按御史高節請治
沿海文武將吏罪嚴禁奸豪交通內地諸奸利其交
易多為之囊橐終不能盡絕二十六年十二月倭犯
寧台二郡大肆殺掠二郡將吏並獲罪時各島諸倭
歲常侵掠濱海奸民又往往勾之浙江巡撫兼制福
興等軍事朱紘乃嚴為申禁獲交通者不俟命輒以

便宜斬之由是閩浙大姓素為倭內主者失利而怨
紂統又數驕疏于朝顯言大姓通倭狀以故閩浙人
皆怨之而閩尤甚巡按御史周亮閩產也上疏詆紂
請改巡撫為巡視以殺其權其黨在朝者左右之竟
如其請又奪紂官羅織其檀殺罪紂自殺自是海禁
復弛亂益滋甚三十二年三月諸倭大舉入寇初浙
江設市舶以中官主之駐寧波帝即位盡撤中官并
撤市舶海濱奸人遂撻其利始猶商主之及嚴禁通

番遂移之貴官家負其直者愈甚索之急則以危言
嚇之或又以好言紿之倭喪其貲不得返已大恨而
大奸若汪直徐海陳東麻葉輩素窟其中以內地不
得逞悉逸海島為主謀倭聽指揮入寇海中巨盜遂
襲倭服飾旗號並分艘掠內地無不大利倭患日劇
廷議復設巡撫三十一年七月以僉都王忬任之而
勢已不可撲滅至是汪直勾引諸倭連艦數百蔽海
而至浙東西江南北瀕海數千里同時告警三十三

年以李天寵代忬又命兵部尚書張經總督軍務徵
兵四方協力進剿

王圻曰倭之入寇隨風所之東北風猛則由薩摩
或五島至大小琉球而仍視風之變遷北多則犯
廣東多則犯閩澎湖島分舶或之泉州等處或之
梅花所長樂縣等處若正東風猛則必由五島歷
天堂官渡水而視風之變遷東北多則至烏沙門
分艚或過韭山海關門而犯溫州或由舟山之南

而犯定海經大猫洋入金塘蛟門則犯象山奉化
由東西而入湖頭則犯昌國入石蒲關則犯台州
入桃渚海門松門諸港正東風多則至李西巖壁
下陳錢分鯨或由洋山之南而犯臨觀犯錢塘或
由洋山之北而犯青村南匯犯太倉或過南沙而
入大江過茶山入瞭角嘴犯瓜儀常鎮等若在大
洋而風歛東南也則犯淮揚登萊過步州洋亂沙
入鹹城口則犯淮安入廟灣港則犯揚州再越而

北則犯登萊若在五島開洋而南風方猛則趨遼陽趨天津大抵倭舶之來恒在清明之後前乎此風候不常難準定清明後方多東北風且積久不變過五月風自南來不利于行矣重陽後風亦有東北者過十月風自西北來亦非所利故防海者以三四月為大汎九十月為小汎其停橈之處焚劫之權雖曰在倭而其帆檣所向一視乎風實有天意有備者率勝前此入寇者多薩摩肥後長

門三州之人其次則大隅筑後博多日向攝摩津
州伊紀等島而豐前豐後和泉之人亦間有之皆
因商于薩摩而附行者蓋日本之民有貧有富有
淑有慝富而淑者或附貢舶或因商舶而來其在
寇舶率皆貧而惡者且山城君山城君倭王別號也號令久
不行于諸島而山口豐後出雲又各專一軍如中
國總督府之義相吞噬今惟豐後強頗併肥前等
六島而有之山口出雲俱以貪滅亡倭蓋無常尊

定主矣

三十四年九月官軍殲倭賊于楊林橋

先是倭賊抄掠四出復合新倭突犯嘉興至王江涇
乃為張經擊斬千九百餘級餘奔柘林其他倭復掠
蘇州境出入太湖大抵真倭十之三從倭者十之七
倭法嚴人皆致死官軍素怯所至奔潰帝遣工部侍
郎趙大華督察軍情文華顛倒功罪諸軍益解體經
天寵並被逮代以楊宜胡宗憲時賊勢蔓延江浙無

不蹂躪新倭來益衆益肆毒每自焚其舟登岸刼掠
自杭州北新闕西剽淳安突徽州至太平府復犯南
京又抵潁墅為官軍所圍追及於楊林橋殲之是役
也賊不過六七十人而經行數千里殺傷幾四千人
厯八十餘日始滅應天巡撫曹邦輔以捷聞文華忌
其功以倭巢于陶宅乃大集浙直兵與宗憲親將之
又約邦輔合勦並營于松江之甌橋倭悉銳來衝遂
大敗文華氣奪賊益熾自樂清登岸流刼黃巖諸縣

被殺擄者無算至嶧縣乃殲之亦不滿二百人而深入三府歷五十日始平其先一枝自山東日照流劫東安衛以至清河阻雨為徐邳軍所殲亦不過數十人流害千里殺戮千餘其悍如此而文華自甄橋之敗見倭寇勢盛侵犯無虛日乃妄以寇息請還朝

王圻曰倭國在海東南其地分五畿七道

詳馬瑞臨考

最為雄長居邪馬臺王自稱泰伯後唐咸亨年間更號為日本其人嗜酒信巫輕生好殺性貪譎以

劫掠為生兵刃極犀利裸身赴鬪慣舞雙刀輕儼
跳躍能以寡勝衆至劫營設伏華人輒墮其術其
俗飲食常用磁器漆器尊敬處用土器有筋匙男
披髮而束之人佩短刀婦人拔其眉黛其額髮垂
背而覆之以髻長曳地男女冶容者黑其齒會時
蹲坐為禮道遇尊長脫鞋履而過人喜啖茶道傍
有茶店邀人啖茶如漢人入酒館也富貴家用茶
末僧徒習佛經者知漢字男女服染青質白文男

衣過膝而止其城池附在山城蓋築四座名聚快
樂院俱在大界等處每城週圍三四里大石高聳
三四重河濶二十餘丈內蓋大樓閣有九層粧黃
金下隔睡房百餘間嘗東西遊卧令人不知以防
陰害其國有天王者自開闢以來相傳至今不與
國事不輟兵馬惟世享國王供奉而已有國王者
受國事掌兵馬盛衰強弱更替不常有官名闕白
者即丞相職代相更替專國政兵馬國中平原橘

膝四姓為日本巨族相竊據為國王天王子娶于其族國王子娶諸大臣家刑無笞杖賦三分之一無他徭工役皆募為之長于步戰怯于水陣精刀法鳥銃而疎鎗弓大舟每駕櫓三十六枝次三十枝又次二十枝近亦有閩人教造閩船者其民有犯罪者不論輕重犯賊者不論多寡即時殺之

三十五年遣使諭日本

從總督胡宗憲請遣寧波諸生蔣洲陳可願往諭日

本國王禁戢島寇招還通番奸商許立功免罪乃留
洲傳諭各島而送可願先還時兩浙皆被倭而慈谿
焚殺獨慘餘姚次之浙西柘林乍浦烏鎮皂林間皆
為賊巢前後至者二萬餘人七月宗憲言賊首毛海
峯自陳可願還一敗倭寇于舟山再敗之滬表徐海
陳東麻葉方連兵攻圍桐鄉宗憲設計間之海遂擒
東葉以降盡殲其餘衆于下浦未幾復蹴海于梁莊
海亦授首餘黨盡滅江南浙西諸寇略平而江北則

犯丹陽及掠瓜州燒漕船者明春復犯如皋海門攻
通州掠揚州高郵入寶應遂侵淮安府集于廟灣逾
年乃克其浙東則盤据舟山亦先後為官軍所襲三
十六年宗憲遣蔣洲招汪直等十月豐後太守源義
鎮等遣其屬隨直等抵舟山之岑港既入見宗憲厚
禮之令謁巡按御史王本固于杭州本固以屬吏其
黨王澈等遂焚舟登山據岑港堅守逾年新倭大至
屢寇浙東三郡其在岑港者徐移之柯梅造新船出

海宗憲亦不之追十一月賊揚帆南去泊泉州之浯
嶼掠同安諸縣攻福寧州破福安寧德明年四月遂
圍福州經月不解福清永福諸城皆被攻燬蔓延于
興化奔突于漳州其患盡移于福建而潮廣間亦紛
紛以倭警聞矣

四十年浙東江北諸倭寇以次平

明年十一月倭陷興化府大殺掠移據平海衛遠近
震動亟徵俞大猷戚繼光劉顯諸將合擊之其侵犯

他州縣者亦為諸將所破福建亦平其後廣東巨寇
曾一本黃朝太等無不引倭為助隆慶時破碣石甲
子諸衛所化州石城吳川陽江諸縣悉遭焚掠并轉
入雷廉瓊三郡萬厯二年又犯寧紹台溫四郡陷廣
東銅鼓衛雙魚所三年犯電白四年犯定海八年犯
浙江韭山及福建澎湖東湧十年犯溫州又犯廣東
十六年犯浙江然是時疆吏懲嘉靖之禍海防頗飭
賊來輒失利其犯廣東者為蜚賊梁本豪勾引勢尤

猖獗總督陳瑞集衆軍擊之斬首千六百餘級沉其船百餘艘本豪亦授首帝為告謝郊廟宣捷受賀

王圻曰國初懲倭之詐緣海備禦幾于萬里其大為衛置軍四千六百四十人其次為所置軍一千一百餘人又次為巡檢司置弓兵百人少亦不下數十人皆大小相維經緯相錯星羅密布狼顧犬防故所在製有數百料大船八檣哨船若風失快船高把哨船十槳飛船凡五等至如定海昌國貢

道所經切近彼島則船數倍蓰他處而以時出哨
各有限準如三月為頭哨四月為二哨五月為三
哨號大汛至六月收港避風及秋七八九月亦如
前為小汛汛畢回衛休息責令各取印信到單海
物為驗若至各港次舉所則又設有水寨營柵以
上舍之而統以指揮千百戶鎮撫總以閫職督以
憲臣所以制禦之者密矣而歲久人玩法去盜生
二十年來山頽濶倒當事者見不可用遂別募以

充遠徵以禦改造巨艦一切從宜而舊法因廢不
譌則亦懲咽之過矣自頃客兵驕暴鮮克宣勞故
中外爭言鄉兵似矣然狗名弗思終屬具文夫所
謂鄉者對客兵而言豈謂是荷鋤秉耜穡奴牧豎
然哉竊謂衛所縣司軍壯弓兵之類宜因舊法潤
澤損益之務足故伍或抽羨丁或僉壯士無論軍
舍通融湊攢優與津給而以其半哨守其半團練
更迭肄之俾皆可戰或慮一時未習不足應猝則

量留舊募以備緩急久之或可盡罷此目前備禦之長策也

神宗萬厯十九年倭酋陷朝鮮命出師東征

日本故有王其下稱闕白者最尊時朝鮮奏倭酋闕白平秀吉聲言明年來犯不知其謀已也二十年遂

陷朝鮮中國亦喪師糜餉垂七載闕白死禍始休

見前

朝鮮條

諸倭亦皆退守島巢東南稍安秀吉凡再傳而

亡終明之世通倭之禁甚嚴閭巷小民至指倭相詈

罵甚以噤其小兒女云

王圻曰平秀吉自丙戌年

萬曆十四年

擅改倭國山城

壬辰

二十一年

入寇高麗將天王二十九年改為文祿

元年吉自為大閣王

猶言國王也

以關白與養子孫七

郎每年元旦率大臣一謁天王他時並不相接時

平清盛秉政父子兄弟盤據要路驕奢淫虐道路

側目原賴朝竄伊豆州起兵據關東乘勝逐平氏

平氏仍據筑前等九州與原各分其地連年相攻

殺賴朝之孫為原家康亦歸服于秀吉嘗計取六十六州分為二關東號相板關西號赤門關二關各有船隻數千二月悉至千丈溪燕齊選兵自十八歲至五十而止善機詐者雖年七十亦用之其所奪州必質其子弟各州實非心服乃威計所迫耳

雞籠山

明史雞籠山傳曰世宗嘉靖末倭寇擾閩大將戚

繼光敗之倭遁居于雞籠山之淡水洋其黨林道
乾從之已道乾懼為倭所併又懼官軍追擊揚帆
直抵淳泥攘其邊地以居號道乾港而雞籠遭倭
焚掠國殘破初悉居海濱既遭倭難稍稍避居山
後忽中國漁舟從魴港飄至遂往來通販以為常
至萬厯末紅毛番泊舟于此因事耕鑿設關闌稱
臺灣焉崇禎八年給事中何楷陳靖海之策言自
袁進李忠楊祿楊策鄭芝龍李魁奇鍾斌劉香相

繼為亂海上歲無寧息今欲靖寇氛非墟其窟不
可其窟維何臺灣是也臺灣在澎湖島外距漳泉
止兩日夜程地廣而腴初貧民時至其地規魚鹹
之利後見兵威不及往往聚而為盜近則紅毛築
城其中與奸民互市屹然一大部落墟之計非
可干戈從事必嚴通海之禁俾紅毛無從謀利奸
民無從得食出兵四犯我師乘其墟而擊之可大
得志紅毛舍此而去然後海氛可靖也時不能用

又曰雞籠山在澎湖嶼東北故名北港又名東番
去泉州甚邇地多深山大澤聚落星散無君長有
十五社社多者千人少或五六百人無徭賦以子
女多者為雄聽其號令雖居海中酷畏海不善搽
舟老死不與鄰國往來永樂時鄭和徧歷東西洋
靡不獻琛恐後獨東番遠避不至和惡之家貽一
銅鈴俾挂諸項蓋擬之狗國也四時以草青為歲
首土宜五穀而不善水田地多竹大至數拱長十

丈以竹構屋覆之以茅廣且長聚族而居中多大
溪流入海水淡故其外名淡水洋

又曰其地北自雞籠南至浪嶠可一千餘里東自
多羅滿西至王城可九百餘里水道順風自雞籠
淡水至福州港口五更可達自臺灣港至澎湖嶼
四更可至自澎湖至金門七更可達東北至日本
七十更可達南至呂宋六十更可達蓋海道不可
以里計舟人分一晝夜為十更故以更計道里云

佛郎機

美洛居附

武宗正德十三年正月佛郎機遣使請封

佛郎機近滿剌加時據其地逐其王遣使臣加必丹
末等請封始知其名詔給方物之直遣還其人久留
不去剽劫行旅至掠小兒為食已而蠻緣鎮守中貴
許入京師帝南巡其使火者亞三因江彬侍帝左右
帝學其語以為戲其留懷遠驛者益掠買良民築室
立寨為久居計亞三侍帝驕甚從駕入都居會同館

見提督主事梁焯不屈膝焯怒撻之彬大詬曰彼甯
與天子嬉戲肯跪汝小官耶十六年帝崩亞三下吏
治自言本華人為番人所使乃伏法絕其朝貢其年
七月又以接濟朝使為詞攜土物求市守臣請抽分
如故事詔復拒之

明史佛郎機傳曰其人長身高鼻貓睛鷹嘴拳髮
赤鬚好經商恃強陵轢諸國無所不往後又稱干
系臘國所產多犀象珠貝衣服華潔貴者冠賤者

笠見尊者則去之初奉佛教後奉天主教市易但伸指示數雖累千金不立約契有事指天為誓不相負自滅滿刺加巴西呂宋三國海外諸番無敢與抗者

又曰正德十五年御史邱道隆言滿刺加乃敕封之國而佛郎機敢併之且啗吾以利邀求封貢決不可許宜却其使臣明示順逆令還滿刺加疆土方許朝貢倘執迷不悛必檄告諸番聲罪致討御

史何鰲言佛郎機最凶狡兵械較諸番獨精前歲
駕大舶突入廣東會城礮聲殷地留驛者遠制交
通入都者禁鰲爭長今聽其往來貿易勢必爭鬪
殺傷南方之禍殆無紀極祖宗朝貢有定期防有
常制故來者不多近因布政吳廷舉謂缺上供香
不問何年來即取貨致番舶不絕于海濫蠻人雜
還于州城禁防既疎水道益熟此其所以乘機突
至也乞悉驅在澳番舶及番人潛居者禁私通嚴

守備庶一方獲安疏下禮部言道隆先宰順德鰲
即順德人故深晰利害宜俟滿剌加使臣至廷詰
佛郎機侵奪鄰邦擾亂內地之罪奏請處置其他
悉如御史言報可

世宗嘉靖二年佛郎機入寇官軍擊走之

先是其將別都盧以巨礮利兵肆掠滿剌加諸國橫
行海上復率其屬疎世利等駕五舟擊破巴西國至
是遂寇新會之西草灣指揮柯榮百戶王應恩禦之

轉戰至稍州向化人潘丁苟先登衆齊進生擒別都
盧疎世利等四十二人斬首三十五級獲其二舟餘
賊復率三舟接戰應恩陣亡賊亦敗遁官軍得其礮
即名為佛郎機副使汪鉉進之朝九年秋鉉累官右
都御史上言塞上墩臺城堡當用其所進佛郎機坐
收不戰之功帝悅即從之火礮之有佛郎機自此始
然將士不善用迄莫能制寇也二十六年佛郎機犯
漳州初廣東文武官月俸多以番貨代時貨至者寡

有議復許佛郎機通市者給事中王希文力爭乃定
令諸番貢不以時及勘合差失者悉行禁止由是番
舶幾絕巡撫林富以粵中公私諸費多資商稅番舶
不至則公私皆窘因言許佛郎機互市其利有四一
御用一充軍餉一粵西仰給粵東有徵發可濟從之
措辦一小民懋遷為生得以販易衣食其中

自是佛郎機得入香山灣為市而其徒又越境商于
福建往來不絕至是年朱紉為巡撫嚴禁通番其人
無所獲利則整衆犯漳州之月港浯嶼副使柯喬等

禦却之二十八年佛郎機犯詔安官軍迎擊于走馬
溪生擒賊首李光頭等九十六人餘遁去巡撫朱統
用便宜斬之怨紃者御史陳九德遂劾其專擅遣給
事中杜汝楨往驗言此滿刺加商人歲招海濱無賴
之徒往來鬻販無僭號流劫事紃擅自行誅誠如所
劾遂被逮自殺蓋不知滿刺加即佛郎機也自紃死
海禁復弛佛郎機遂縱橫海上無所忌而其市香山
澳壕鏡者至築室連城雄踞海畔若一國然將吏不

肖者反視為外府矣

明史佛郎機傳曰嘉靖四十四年偽稱滿剌加入貢已改稱蒲都麗家守臣以聞下部議言必佛郎機假托乃却之萬厯中破滅呂宋盡擅閩粵海上之利勢益熾至三十四年又于隔水青州建寺高六丈闊敞奇闊非中國所有知縣張大猷請毀其高墻不果明年番禺舉人盧廷龍請盡逐澳中諸番出居浪白外海還我壕鏡故地當事不能用

番人既築城聚海外雜番廣通貿易至萬餘人吏
其土者皆畏懼莫敢詰甚有利其寶貨倖禁而陰
許之者總督戴耀在事十三年養成其患番人又
潛匿倭賊敵殺官軍四十二年總督張鳴岡檄番
人驅倭出海因請申明約束從之居三年設叅將
于中路雍陌營調千人戍之防禦漸密天啓元年
守臣慮其終為患遣監司馮從龍等毀其所築青
州城番亦不敢拒其時大西洋人來中國亦居此

澳蓋番人本求市易初無不軌謀中國疑之過甚
迄不許其朝貢又無力以制之故議者紛然終
明之世此番固未嘗為變也

明神宗實錄萬曆四十二年總督張鳴岡上言粵
之有澳夷猶疽之在背也澳之有倭賊猶虎之傳
翼也今檄番人驅倭出海一旦斥遣不費一矢此
聖天子威德所致惟是倭去而番尚存有謂宜勦
除者有謂宜移之浪白外洋就船貿易者顧兵難

輕動而壕鏡在香山內地官軍環海而守彼日食
所需咸仰于我一懷異志我即致其死命若移之
外洋則巨海茫茫奸宄安詰制禦安施不如申明
約束內不許一奸闌出外不許一倭闌入無啓釁
無弛防相安無患之為愈也部議從之

按明史佛郎機傳壕鏡在香山縣南虎跳門外先

是暹羅占城瓜哇琉球淳泥諸國互市俱在廣州

設市舶司領之

互詳市
雜考

正德時移于高州之電白

縣嘉靖十四年指揮黃慶納賄請于上官移之壕
鏡歲輸課二萬金佛郎機遂得混入高棟飛甍櫺
比相望閩粵商人趨之若鶩久之其來益衆諸國
人畏之遂專為所據矣

美洛居

明史美洛居傳曰神宗萬厯時為佛郎機所攻其
酋戰敗請降乃宥令復位歲以丁香充貢不設戍
兵而去已紅毛番橫海上知佛郎機兵已退乘虛

直搗城下執其酋語之曰若善事我我為若主殊
勝佛郎機也酋不得已聽命復位如故佛郎機酋
聞之大怒率衆來攻道為華人所殺

語具呂宋傳

時紅

毛番雖據美洛居率一二歲率衆返國既返復來
佛郎機酋子既襲位欲竟父志大舉兵來襲值紅
毛番已去遂破美洛居殺其酋立己所親信主之
無何紅毛番又破其城逐佛郎機所立酋而立美
洛居故王之子自是歲構兵人不堪命華人流寓

者遊說兩國令各罷兵分國中萬老高山為界山
以北屬紅毛番南屬佛郎機始稍休息而美洛居
竟為兩國所分

又曰美洛居俗訛為米六合居東海中頗稱饒富
酋出威儀甚備所部合掌伏道旁男子削髮女椎
結地有香山雨後香墮沿流滿地居民拾取不竭
其酋委積充棟以待商舶之售東洋不產丁香獨
此地有之可以辟邪故華人多市易

渤海

新羅雜記歲時附

遼太祖天贊四年十二月舉兵親征渤海大誣謬

閏月圍扶餘府次年正月拔其城誅其守將又遇誣
謬老相兵破之遂圍輝罕城誣謬素服橐索牽牛率
僚屬三百餘人出降帝優禮而釋之越數日誣謬復
叛攻其城破之罵幸城中誣謬請罪馬前詔以兵衛
誣謬及族屬以出二月改元天顯又改淳海國為都
木達輝罕城為天福冊太子倍為人皇王以主之七

欽定四庫全書

欽定四庫全書

四

月衛送大諲譔于皇都西築城以居之其後又改扶餘為黃龍府

臣等謹按葉隆禮契丹國志云先是渤海國王大諲譔本與奚契丹為唇齒國太祖初興併吞八部繼及奚國大諲譔深憚之陰與新羅諸國結援太祖知之集議未決後因遊獵有黃龍在其壇屋上連發三矢殪之龍墜其前後太子德光建黃龍府即其地也今以紀考之則以扶餘府為黃龍府有

不相合者又太祖九年十月及天贊四年十一月
新羅皆有通貢事天顯元年二月渤海既平靺鞨
與滅貊兩國俱來貢太宗會同元年八月靺鞨又
來貢以已見土貢考第附載之若遼以後則諸國
俱無可述者

又按契丹國志四至隣國謂東南至新羅國西以
鴨綠江東八里黃土嶺為界至保州一十一里若
靺鞨則謂為東北境與鐵驪為界無君長統轄春

夏居室中秋冬則穿地為洞深可數丈居以避寒
不進貢契丹亦不爭戰惟以細鷹等與契丹交易
見互市門西南至上京五千里而滅貊則不載

哈斯罕

遼聖宗開泰元年哈斯罕大王呼勒希來朝

至天祚帝天慶六年十一月東面行軍副統馬格等
攻之敗績哈斯罕始與遼絕金時哈斯罕其所屬部
也

鐵驪

遼興宗重熙十六年鐵驪仙門來朝加右監門衛大將軍

臣等謹按遼史鐵驪自太祖迄道宗朝無歲不貢

見土貢考此則以仙門始入貢而特加以官耳至天祚

帝乾統時鐵驪貢遂絕

又按契丹國志鐵驪

作鐵青

國言語衣服屋宇耕養

稍通阿異眉等國無君長皆雜處山林西南至上

京五千餘里

博羅滿達

烏舍附

遼聖宗太平七年博羅滿達部遣使來貢

其後人戶亦往往來附以方物進者歲相踵

臣等謹按遼史聖宗太平二年鐵驪遣使獻烏舍

十六戶王圻云博羅滿達部多烏舍民戶疑烏舍

乃博羅滿達鄰部也若三部入貢事俱見土貢考

又按契丹國志烏舍等國各一萬餘戶西南至生

女直國界衣服耕種屋宇語言與女直異西至上
京四千餘里

富珠哩

遼聖宗統和二十二年富珠哩偕烏舍等部來朝

開泰時亦如之

臣等謹按哈斯罕鐵驪博羅滿達烏舍富珠哩等
俱不知其所自始惟見于遼史遼後亦無可述者
又按渤海以下諸國王圻續考皆列為東南夷今

考遼之建國東至高麗南至宋登萊州西至雲中
府北至蒙古以契丹國志地里圖及鄰國四至考
之則渤海新羅靺鞨在其東鐵驪烏舍在其東北
故改附于東夷之後

欽定續文獻通考卷二百三十七

欽定四庫全書

史部

欽定續文獻通考卷一百四十

三子全

主事臣陳若霖覆校

總校官內閣中書臣孫溶

欽定四庫全書

欽定續文獻通考卷二百三十八

四裔考

東南夷

琉球 三典附

元世祖至元二十八年遣使持詔諭琉球

是年九月從海船副萬戶楊祥請以六千軍往降之
不聽命則遂伐之繼有書生吳志斗生長福建熟知

海道利病以爲若欲收附且就澎湖發船往諭相水
勢地利然後興兵未晚乃命祥充宣撫使給金符吳
志斗禮部員外郎阮鑒兵部員外郎並給銀符往使
琉球二十九年三月自汀路尾澳舟行四月至澎湖
而還成宗元貞元年九月福建省平章高興遣人赴
琉球國擒生口一百三十餘人

臣等謹按馬端臨考載琉球事僅見於隋大業時

元史外國傳謂漢唐以來史所不載近代諸番市

舶不聞至其國者琉球在南海之東漳泉興福四
州界內澎湖諸島與彼相對天氣清明時望之隱
約若烟若霧西南北岸皆水至澎湖漸低近琉球
則謂之落漈漈者水趨下而不回也凡西岸漁舟
到澎湖以下遇颶風發漂流落漈回者百一蓋琉
球在外夷最小而險云

又元史外國傳曰三嶼國近琉球世祖至元三十
年命選人招誘之平章政事巴延等言此國之民

不及二百戶時有至泉州為商賈者去年軍船入琉球過其國國人餉以糧食館我將校無他志也乞不遣使從之

明太祖洪武五年正月命以即位建元詔告琉球

琉球國有三王曰中山曰山南曰山北皆以尚為姓而中山最強是年遣行人楊載使其國至九年夏前所遣刑部侍郎李浩自其國歸言琉球不貴紃綺惟貴磁器鐵釜自是賞賚多用諸物十五年中山王察

度山南王承察度與山北王怕尼芝爭雄互相攻伐
命內史監丞梁民賜之勅令罷兵息民三王並奉命
琉球入貢事
俱詳土貢考
二十五年中山山南王從子及寨官子

偕肄業國學明年山北王怕尼芝卒子攀安知嗣二
十九年春令山南生肄國學者歸省冬復來中山亦
遣寨官子及女官生姑魯妹二人先後來肄業其感
慕華風如此

王圻曰其國有大琉球小琉球其俗去髭黥手羽

冠毛衣殺人祭神無禮節好剽掠其產闢鏤樹疏
黃胡椒熊羆豺狼自福建梅花所開洋順颶利舶
七日可至其國自古不聞於中朝隋海師何蠻羽
騎尉朱寬訪得之虜其男女五千人元遣人招諭
不從國王初姓歡斯名渴剌兜後嗣王曰尚圓曰
尚真曰尚清分為三王

成祖永樂二年二月命中山王世子武寧襲位

武寧遣使告父喪遣官祭賻遂有是命四月山南王

從弟王應祖亦遣使告承察度之喪謂前王無子傳
位應祖乞加朝命且賜冠帶從之時山南使臣私齎
白金詣處州市磁器事發當論罪帝賞之四年中山
進奄豎數人帝以不可絕人類還之五年四月中山
王世子思紹遣使告父喪封賜如前儀十一年山南
王應祖為其兄達勃期所弑諸寨官討誅之推應祖
子他魯每為主以十三年三月請封從之二十二年春
中山世子尚巴志來告父喪祭賻如常儀

仁宗洪熙元年勅封巴志為中山王

至正統七年正月中山世子尚忠來告父喪

時山北山南俱

已為中山所併詳土貢考

命給事中余忭等封忠為中山王勅使

之用給事中自茲始忭等還受其黃金沉香倭扇之
贈為偵事者所覺並下吏杖而釋之十二年二月世
子尚思達來告父喪命官往封景泰二年思達卒無
子其叔父金福攝國事如例往封之五年二月金福
弟泰久奏長兄金福玕次兄布里與兄子志魯爭立

兩傷俱隕國中臣民推臣權攝國事明年四月封泰
久為王六年三月世子尚德來告父喪亦封為王成
化七年三月世子尚圓來告父喪封為王十四年四
月卒其子尚真來告喪乞嗣爵命往封之嘉靖五年
尚真卒其世子尚清請封十一年乃命給事中陳侃
等持節往封及還却其贈十四年貢使至仍以所贈
黃金四十兩進於朝乃勅侃等受之三十六年來告
尚清之喪封其世子尚元為王

神宗萬曆四年七月遣官封尚永為中山王

先是元年冬尚永遣使告父喪請襲爵至是封之十九年尚永卒二十三年世子尚寧請襲福建巡撫許孚遠以倭氛未息請從領封之議禮官范謙議如其言二十八年其陪臣請如祖制禮官余繼登言累朝冊封琉球伐木造舟動經數歲使者蹈風波之險小國苦供億之煩宜一如前議帝雖可之而卒遣使往至三十三年七月渡海竣事四十年其國為倭寇所

破天啓三年尚寧已卒其世子尚豐請封時中國多事科臣應使者亦憚行故封典久稽至崇禎二年又請封命遣官如故事乃命戶科給事中杜三策行人揚掄往成禮而還

和蘭

明神宗萬厯二十九年和蘭駕大艦薄香山旋引去和蘭又名紅毛番地近佛郎機永樂宣德時鄭和下西洋厯諸番數十國無所謂和蘭者其人深目長

鼻髮眉鬚皆赤足長尺二寸頰偉倍常時福建商人
歲給引往販大泥呂宋及咬啣吧者和蘭人就諸國
轉販未敢窺中國自佛郎機市香山據呂宋和蘭聞
而慕之至是駕大艦携巨礮直薄呂宋呂宋人力拒
之則轉薄香山澳澳中人數詰問言欲通貢市不敢
為寇當事難之稅使李道即召其酋入城遊處一月
不敢聞於朝乃遣還澳中人慮其登陸謹防禦始引
去

三十二年七月和蘭駕艦抵彭湖

海澄人李錦及奸商潘秀郭震久居大泥與和蘭人習語及中國事錦曰若欲通貢市無若漳州者漳南有澎湖嶼去海遠誠奪而守之貢市不難成也其酋麻韋郎曰守臣不許奈何曰稅使高竄嗜金銀甚若厚賄之彼特疏上聞天子必報可守臣敢抗旨哉酋曰善錦乃代為大泥國王書一移家一移兵備副使一移守將俾秀震齎以來守將陶拱聖大駭亟白當

事繫秀於獄震遂不敢入初秀與酋約入閩有成議
當遣舟相聞而酋卞急不能待即駕二大艦直抵彭
湖時汎兵已撤如入無人之墟遂伐木築舍為久居
計錦亦潛入漳州偵探詭言被獲逃還當事已廉知
其狀并繫獄已而議遣二人諭其酋還國許以自贖
且拘震與俱三人既與酋成約不欲自彰其失第云
我國尚依違未定而當事所遣將校詹獻忠齎檄往
諭者乃多携幣帛食物覲其厚酬海濱人又潛載貨

物往市酋益觀望不肯去當事屢遣使諭之見酋語
輒不競愈為所慢而案已遣心腹周之範詣酋說以
三萬金餽案即許貢市酋喜與之盟已就矣會總兵
施德政令都司沈有容將兵往諭有容負膽智大聲
論說酋心折乃曰我從不聞此言其下人露刃相詰
有容無所懾盛氣與辨酋乃悔悟令之範還所贈金
止以哆囉噠玻璃器及番刀番酒餽案乞代奏通市
案不敢應而撫按嚴禁奸民下海犯者必誅由是接

濟路窮番人無所得食十月末揚帆去巡撫徐學聚劾秀錦等罪論死遣戍有差

熹宗天啟三年巡撫商周祚以紅毛番遵諭違徙聞

先是佛郎機橫海上紅毛與爭雄復汎舟東來攻破美洛居國與佛郎機分地而守後又侵奪臺灣地築室耕田久留不去海上奸民闌出貨物與市已又出據澎湖築城設守漸為求市計守臣懼禍說以毀城違徙即許互市番人從之果毀其城移舟去周祚以

聞然其據臺灣自若也已而互市不成番人怨復築
城澎湖掠漁舟六百餘艘俾華人運土石助築尋犯
廈門官軍禦之俘斬數十人乃詭詞求款再許毀城
遠徙而修築如故已又泊舟風櫃仔出沒浯嶼白坑
東椗莆頭古雷洪嶼沙洲甲洲間要求互市而海寇
李旦復助之濱海郡邑為戒嚴

四年正月巡撫南居益發兵攻破紅毛番澎湖之警以
息

初居益甫至即上言入境以來聞番船五艘續至與
風櫃仔船合凡十有一艘其勢愈熾有小校陳士瑛者
先遣往咬啍吧宣諭其王至三角嶼遇紅毛船言咬
啍吧王已往阿南國因與士瑛偕至大泥謁其王王
言咬啍吧國王已大集戰艦議往澎湖求互市若不
見許必至構兵蓋阿南即紅毛番國而咬啍吧大泥
與之合謀必不可以理論為今日計非用兵不可因
列上調兵足餉方畧部議從之至是月遣將先奪鎮

海港而城之且築且戰番人乃退守風櫃城居益增
兵往助攻擊數月寇猶不退乃大發兵諸軍齊進寇
勢窘兩遣使求緩兵容運米入舟即退去諸將以窮
寇莫追許之遂揚帆去獨渠帥高文律等十二人據
高樓自守諸將破禽之獻俘於朝番警以息而其據
臺灣者猶自若也

愍帝崇禎十年紅毛番薄廣州旋遁去

先是紅毛番為鄭芝龍所破不敢窺內地者數年乃

與香山佛郎機通好私貿外洋至是駕四舶由虎跳
門薄廣州聲言求市其酋招搖市上奸民視之若金
穴益大姓有為之主者當道鑒壕鏡事議驅斥或從
中撓之會總督張鏡心初至力持不可乃遁去已為
奸民李葉榮所誘交通總兵陳謙為居停出入事露
葉榮下吏謙自請調用以避禍為給事中凌義渠等所
劾坐逮訊自是奸民知事終不成不復敢勾引而番
人猶據臺灣自若

明史和蘭傳曰其本國在西洋者去中華絕遠華人未嘗至其所恃惟巨舟大礮舟長三十丈廣六丈厚二尺餘樹五桅後為三層樓旁設小牕置銅礮桅下置二丈巨鐵礮發之可洞裂石城震數十里世所稱紅夷礮即其製也然以舟大難轉或遇淺沙即不能動而其人又不善戰故往往挫衄其所役使名烏鬼入水不沉走海面若平地其桅後置照海鏡大徑數尺能照數百里其人悉奉天主

教所產有金銀琥珀瑪瑙玻璃天鵝絨瑣服多囉哩國
土既富遇中國貨物當意者不惜厚資故華人樂
與為市

呂宋

沙瑤叻哩附

明太祖洪武五年正月呂宋遣使偕瑣里諸國來朝
永樂三年十月遣官齎詔撫諭其國至萬厯時佛郎
機強與呂宋互市久之見其國弱可取乃奉厚賄遣
王乞地如牛皮大建屋以居王不虞其詐而許之其

人乃裂牛皮聯屬至數千丈圍呂宋地乞如約王大駭然業已許諾無可奈何遂聽之而稍徵其稅如國法其人既得地即營室築城列火器設守禦具為窺伺計竟乘其無備襲殺其王逐其人民而據其國名仍呂宋實佛郎機也

明史呂宋傳曰呂宋居南海中去漳州甚近閩人以其地近且饒富商販者至數萬人往往久居不返至長子孫佛郎機既奪其國遣酋來鎮慮華人

為變多遜之歸留者悉被其侵辱然華商嗜利趨
死不顧久之復成聚造礦稅使者四出奸宄盜起
言利有關應龍張巖者言呂宋機易山素產金銀
歲可採金十萬兩銀三十萬兩者即納其奏舉朝
駭異都御史溫純等連章力爭皆不聽遣人往勘
實妄言而呂宋親中朝將襲其國諸流寓者將為
內應先後殺死者二萬五千餘人朝廷不能討其
後華人復稍稍往蠻人利互市亦不拒久之復成

聚而佛郎機時已併滿剌加蓋以呂宋勢愈強橫
遂據廣東香山澳築城互市患復中於粵矣

臣等謹按一統全圖呂宋今為千系臘所屬之國
一名敏林臘又千系臘在西北絕境今為呂宋祖
國云

又明史沙瑤叻嗶嘽傳曰沙瑤與叻嗶嘽接壤叻
嗶嘽在海畔沙瑤稍紆入山隈皆與呂宋近男女
蓄髮椎結男子用履婦女跣足以板為城豎木覆

茅為室崇釋教多建禮拜寺男女之禁甚嚴夫行
在前其婦與人嘲笑夫即刃其婦所嘲笑之人不
敢逃仕其剝割盜不問大小輒論死孕婦將產以
水灌之且以水滌其子置水中生而與水習矣物
產甚薄華人商其地所携僅磁器鍋釜之類重者
至布而止後佛郎機據呂宋多侵奪隣境惟二國
號令不能及

合貓里

明成祖永樂三年合貓里遣使來朝

時附爪哇使臣來

明史合貓里傳曰海中小國也土瘠多山山外大海饒魚蠡人知耕稼其國又名貓里務近呂宋商舶往來漸成富壤華人入其國不敢欺陵市法最平故華人為之語曰若要富須往貓里務有網巾礁老者最克悍海上行劫舟若飄風遇之無免者然特惡商舶不至偶有至者待之甚善貓里務後

遭寇掠人多死傷地亦貧困商人慮為礁老所劫
鮮有赴者

臣等謹按合貓里四至不可考考一統全圖亦不
載而載有網巾礁腦在呂宋之南蘇祿之北疑即
是云

婆羅

明成祖永樂三年十月遣使者齎璽書綵幣撫諭婆羅
四年十二月其國東西二王並遣使奉表朝貢

明史婆羅傳曰婆羅又曰文萊東洋盡處西洋所
自起也唐時有婆羅國高宗時常入貢其地負山
面海崇釋教惡殺喜施禁食豕肉犯者罪死有禮
拜寺每祭用犧其王薙髮裹金繡巾佩雙劍出入
徒步從者二百餘人萬厯時為王者閩人也或言
鄭和使婆羅有閩人從之留居其地後竟據其國
而王之邸旁有中國碑王有金印一篆文上作獸
形言永樂朝所賜民間嫁娶必請此印印背上以

為榮後佛郎機橫舉兵來擊王率國人走入山谷
中放藥水流毒殺人無算王得返國佛郎機遂犯
呂宋

古麻刺朗

明成祖永樂十五年九月命使撫諭古麻刺朗

時遣中官張謙齋勅及賜物撫諭之十八年八月其
王幹刺義亦奔敦率妻子陪臣隨謙來朝禮之如蘇
祿國賜以印誥冠帶等物明年正月辭還至福建邁

疾卒遣官諭祭諡康靖命其子刺苾嗣為王率衆歸

臣

等謹按王圻續考及明史外國傳古麻剌朗東

南海中小國也前此無可考明代事亦止此

瓜哇

閩婆蘇吉丹日羅夏治重迦羅諸國附

元世祖至元二十九年二月詔出師征瓜哇

先是遣使臣右丞孟瑛往黔其面乃大舉兵西征十

二月福建江西湖廣三省軍會泉州自後渚啓行明

年正月水陸並進破其國而還

臣等謹按元史瓜哇傳在海外視占城益遠自泉
南登舟海行者先至占城而後至其國其風俗土
產不可考大率海外諸番國多出奇寶取貴於中
國而其人情性語言與中國不能相通王圻續考
謂瓜哇即古閩婆國則風俗土產馬端臨考具詳
之又明史列傳則云閩婆古曰閩婆達宋元嘉時
始通中國唐曰訶陵又曰社婆其王居閩婆城宋
曰閩婆皆入貢洪武十一年其王摩那訶喃遣使

來後不復至或曰瓜哇即閩婆然元史瓜哇傳不言且曰其風俗物產無所考又太祖時兩國並時入貢其王之名不同或本為二國其後為瓜哇所滅然不可考矣

明太祖洪武二年遣使以即位詔諭瓜哇

三年又以平定沙漠頒詔於其國九月其王昔里八

達刺蒲遣使奉金葉表來朝嗣是貢使屢至其國又

有東西二王

東蕃王勿院
西蕃王勿院
結

至永樂四年西王

都馬拔與東王構兵東王戰敗國被滅通朝使經東
王地部卒入市西王國人殺之凡百七十人西王懼
而謝罪帝賜勅切責命輸黃金六萬兩以償已而獻
萬兩禮官請索如數帝曰朕欲使遠人畏罪耳寧利
其金耶悉捐之天順四年其使者回至安慶酗酒與
入貢番僧鬪僧死者六人禮官請治伴送行人罪使
者勅國王自治從之弘治十二年以後其使鮮至者
王圻曰有與瓜哇相接者為重迦羅高山奇秀內

有一石洞前後三門可容一二萬人田穀氣候與
瓜哇畧同風俗頗醇國無酋長推年高有德者主
之又去數程曰孫陀羅琵琶拖曰丹重曰圓嶠曰
彭里不事耕作專尚寇掠與吉陀崎諸國相通商
舶少至

明史瓜哇傳曰其國近占城二十晝夜可至其建
國始於漢宣帝元康元年故宣德七年奉表書一
千三百七十六年地廣人稠性克悍男子無少長

貴賤皆佩刀稍忤輒相賊故其甲兵為諸蕃之最
字類瑣里無紙筆刻於茭葦葉氣候常似夏稻歲
二稔無几榻七箸人有三種華人流寓者服食鮮
華他國賈人居久者亦尚雅潔其本國人最汙穢
好啖蛇蟻蟲蛆與犬同寢食狀黝黑裸頭赤脚崇
信鬼道殺人者避之三日即免罪父母死舁至野
縱犬食之不盡則大戚燔其餘妻妾多燔以殉其
國一名蒲家龍又曰下港曰順塔萬厯時紅毛番

築土庫於大澗東佛郎機築於大澗西歲歲互市
中國商旅亦往來不絕其國有新村最號饒富中
華及諸番船舶輻輳其地寶貨填溢其村主即廣東
人永樂九年自遣使表貢

又明史蘇吉丹傳曰蘇吉丹瓜哇屬國後訛為思
吉港國在山中止數聚落首居吉力石其水滴舟
不可泊商船但往饒洞其地平行國人皆就此貿
易其與國有思魯瓦及猪蠻猪蠻多盜華人鮮至

又曰羅夏治傳曰日羅夏治近瓜哇永樂三年同
碟里遣使附瓜哇使臣入貢國小知種藝無盜賊
亦尚釋教所產止蘇木胡椒

又碟里傳曰永樂三年遣使附瓜哇使臣入貢地
尚釋教俗淳少訟物產甚薄

三佛齊

文郎馬神買哇柔附

明太祖洪武三年遣使詔諭三佛齊

明年其王馬哈刺札八刺卜遣使奉表入貢時其國

有三王曰怛麻沙那阿者曰麻那哈寶林邦曰僧伽
烈字蘭九年怛麻沙那阿者卒子麻那者巫里嗣明
年遣使言嗣子不敢擅立請命於朝勅封為三佛齊
國王時爪哇強已威服三佛齊而役屬之聞天朝封
與已埒則大怒遣人誘朝使邀殺之天子亦不能問
罪其國益衰三十年爪哇據其國改其名曰舊港三
佛齊遂亡國中大亂爪哇亦不能盡有其地華人流
寓者往往起而據之有梁道明者廣州南海縣人久

居其國閩粵軍民泛海從之者數千家推道明為首
往視一方會指揮孫鉉使海外遇其子挾與俱來永
樂三年以行人譚勝受與道明同邑命齎勅招之道
明及其黨鄭伯可隨入朝四年舊港頭目陳祖義遣
子士良道明遣從子觀政並來朝祖義亦廣東人雖
親貢而為盜海上貢使往來者苦之詐降於中官鄭
和和施進卿者告之為和所禽獻於朝伏誅時施進
卿適遣婿邱彥城來朝命進卿為舊港宣慰使雖受

朝命猶服屬瓜哇其地狹小非故時三佛齊比也二十二年進卿死許其子濟孫嗣洪熙元年訴舊印為火燬命重給之嘉靖末廣東大盜張璉作亂官軍已報克獲萬厯五年商人詣舊港者見璉列肆為番船長漳泉人多附之猶中國市舶官云

明史三佛齊傳曰其地為諸番要會在瓜哇之西順風八晝夜可至轄十五洲土沃宜稼語云一年種穀三年生金言收穫盛而貿金多也俗富好淫

習於水戰隣國畏之地多水惟部領陸居庶民皆
水居編筏築室繫之於樁水漲則筏浮無沉溺患
欲徙則拔樁去之不費財力下稱其上曰詹卑
國君後大酋所居即號詹卑國改故都為舊港初
也本富饒自瓜哇破滅後漸至蕭索商舶鮮至

臣等謹按馬端臨考三佛齊與干陀利各自為國
明史則謂三佛齊古名干陀利宋孝武梁武帝皆
通使至宋為三佛齊顧炎武日知錄謂韓愈廣州記

有干陀利註家皆闕以史考之梁書海南諸夷傳

干陀利國在南海洲上其俗與林邑扶南略同出

班布吉貝檳榔檳榔特精好為諸國之最

梁王僧孺有謝

賜干陀利所獻檳榔啟

周弘正傳有罪應流徙敕以賜干陀

利國陳書世祖紀天嘉四年干陀利國遣使獻方

物惟宋書孝武帝紀孝建二年斤陀利國遣使獻

方物

南史同

則又誤以干為斤矣

明史文即馬神傳曰其國以木為城其半倚山酋

蓄繡女數百人出乘象則繡女執衣履刀劍及櫝
榔盤以從或泛舟則酋跣坐牀上繡女列坐其下
與相向或用以刺舟威儀甚都民多縛木水上築
室以居如三佛齊男女用五色布纏頭腹背多袒
或著小袖衣裳頭而入下體圍以幔初用蕉葉為
食器後與華人市漸用磁器尤好磁甕畫龍其外
死則貯甕中以葬其俗惡淫奸者論死華人與女
通輒削其髮以女配之永不聽歸女苦髮短問華

人何以致長給之曰我用華水沐之故長耳其女
信之競市船中水以沐華人故靳之以為笑端女
或悅華人持香蕉甘蔗茉莉相贈遺多與之調笑
然憚其法嚴無敢私通者其深山中有村名烏籠
里憚其人盡生尾見人輒掩面走避然地饒沙金
商人持貨往市者擊小銅鼓為號置貨地上即引
退丈許其人乃前視當意者置金於旁主者遙語
欲售則持貨去否則懷金以歸不交言也所產有

犀牛孔雀鸚鵡沙金鶴頂降香蠟藤席葭藤蓆撥
血竭肉苳蔻獐皮諸物

又曰文郎馬神鄰境有買哇柔者性兇狠每夜半
盜斬人頭以去裝之以金故商人畏之夜必嚴更
以待始文郎馬神首有賢德待商人以恩信子三
十一人恐擾商舶不令外出其妻乃買哇柔酋長
之妹生子襲父位聽其母族之言務為欺詐多負
商人價直自是赴者亦稀

臣等謹按一統全圖馬神古稱文狼在東南之極邊

馮嘉施蘭

明成祖永樂四年八月馮嘉施蘭酋嘉馬銀等來朝
賜鈔幣有差六年八年又至從者亦有賜

臣等謹按馮嘉施蘭其四至不可考考王圻續考
及明史俱載於瓜哇之後馬神文郎之前故附於
此

蘇門答刺

須文達那附

明成祖永樂三年蘇門答刺酋宰奴里阿必丁遣使來
朝詔封為國王

先是其王之父與隣國花面王戰中矢死王子年幼
妻號於衆曰孰能為我報仇者我以為夫與共國事
有漁翁聞之率國人往馘其王而還王妻遂與之合
稱為老王既而王子年長潛與部領謀殺老王而襲
其位老王弟蘇幹刺逃山中連年率衆侵擾十三年

中官鄭和至其國蘇幹刺以頒賜不及已怒統數萬人邀擊和勒部卒及國人大破之追至南渤利國俘以歸其王遣使入謝宣德九年王弟哈利之漢來朝明年遣弟哈尼者罕入朝言王老不能治事請傳位於子乃封其子阿卜賽亦的為王

明史蘇門答刺傳曰蘇門答刺在滿刺加西順風九晝夜可至或言即漢條枝唐波斯大食二國地西洋要會也迨萬厯間國兩易姓其時為王者人

奴也奴之主為國大臣握兵柄奴禁黥一日隨主
入朝見王鞠躬惟謹出謂主曰主何恭之甚主曰
彼王也焉敢抗曰主第不欲王爾欲之主即王矣
主詫叱退之他日又進曰王左右侍衛少主擁重
兵出鎮必入辭請以奴從主言有機事乞屏左右
王必不疑奴乘間刺殺之奉主為王主從之奴果
殺王其主遂篡位任奴為心腹委以兵柄未幾奴
復殺主而代之其國俗頗淳出言柔媚惟王好殺

歲殺十餘人取其血浴身謂可除疾貨舶至貿易
稱平地本瘠無麥有禾禾一歲二稔四方商賈輻
輳華人往者以地遠價高獲利倍他國其氣候朝
如夏暮如秋夏有瘴氣婦人裸體惟腰圍一布其
他風俗類滿刺加篡弑後易國名曰啞齊
又曰洪武十六年頒文達那國王殊旦麻勒兀達
盼遣使俺八兒來朝貢或言即蘇門答刺洪武時
所更然貢物與王之名皆不同無可考

等謹按一統全圖蘇門答刺在爪哇之東南由南而西為三佛齊為丁機宜而後為滿刺加則明史謂在滿刺加西者誤也

蘇祿

高藥附

明成祖永樂十五年蘇祿國三王來朝

東王巴都葛叭哈刺西王麻哈刺叱葛刺麻丁洞王
妻叭都葛巴刺卜並率其家屬頭目凡三百四十餘
人浮海朝貢禮之若滿刺加尋並封為國王王居二十

七日辭歸東王卒於德州賜祭葬謚恭定留妻妾僕
從十人守墓俟畢三年喪遣歸即封其長子都馬舍
為蘇祿國東王至二十一年東王妃還國厚賜遣之
明史蘇祿傳曰蘇祿地近浹泥閩婆洪武初發兵
侵浹泥大獲以聞婆援兵至乃還萬厯時佛郎機
屢攻之城據山險迄不能下其國於古無所考地
瘠寡粟麥民率食魚蝦煮海為鹽釀蔗為酒織竹
為布氣候常熱有珠池夜望之光浮水面土人以

珠與華入市易大者利數十倍商舶將返輒留數
人為質冀其再來其旁近國名高藥出玳瑁

臣等謹按呂宋以下諸國皆王圻續考所稱南夷
者茲從一統全圖考正之

欽定續文獻通考卷二百三十八